

四庫全書

集部

欽定四庫全書

集部

禪月集卷一至四

詳校官司業臣納麟寶

檢討臣何思鈞覆勘

總校官進士臣朱 鈐

校對官待詔臣胡士震

謄錄監生臣王志遠

欽定四庫全書

集部二

禪月集

別集類一 唐

提要

臣等謹案禪月集二十五卷補遺一卷唐釋貫休撰貫休字德隱姓姜氏蘭谿人舊本題曰梁人案貫休初以乾寧三年依荆師成汭後歷遊高季興錢鏐間晚乃入蜀依王建乾德癸酉卒年八十一終身實未入梁舊本

誤也其集初曰西岳集皆居荊州時作吳融序之貫休沒後其門人曇域編次歌詩文贊為三十卷自為後序題曰禪月集此本為宋嘉熙四年蘭谿堯率寺僧可燦所刊毛晉得而重刊之僅詩二十五卷豈佚其文贊五卷耶補遺一卷亦晉所輯然所收佚句如朱門當大道風雨立多時一聯乃贈乞食僧詩今在第十七卷之首但道作路雨作雪耳晉不

辨而重收之殊為失檢文獻通攷別載寶月
集一卷亦云貫休作今已不傳然曇域不云
有此集疑馬端臨或誤毛晉又云西岳集或
作南岳集攷貫休生平未登太華疑南岳之
名為近之西字蓋傳寫誤也又書籍刊本始
於唐末然皆傳布古書未有特刻專集者曇
域後序作於王建乾德五年稱檢尋稿草及
闡記憶者約一千首雕刻成部則刊行專集

自是集始是亦可資考證也乾隆四十六年
十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

禪月集卷一

唐 釋貫休 撰

樂府古題雜言二十九首

善哉行

傷古曲
無知音

有美一人兮婉如清揚識曲別音兮令姿煌煌繡袂捧
琴兮登君子堂如彼萱草兮使我憂忘欲贈之以紫
玉尺白銀鐺久不見之兮湘水茫茫

讀離騷經

湘江濱湘江濱蘭紅芷白波如銀終須一去呼湘君問
湘神雲中君不知何以交靈均我恐湘江之魚兮死後
盡為人曾食靈均之肉兮箇箇為忠臣又想靈均之骨
兮終不曲千年波底色如玉誰能入水少取得香沐函
題貢上國貢上國即全勝和璞懸瓏垂棘結綠

陽春曲

江東廣
明初作

為口莫學阮嗣宗不言是非非至公為手須似朱雲輩

折檻英風至今在男兒結髮事君親須數前賢多慷慨
歷數雍熙房與杜魏公姚公宋開府盡向天上仙宮閒
處坐何不却辭上帝下下土忍見蒼生苦苦苦

白雪曲

列鼎佩金章淚眼看風枝却思食藜藿身作屠沽兒負
米無遠近所希升斗歸為人無貴賤莫學雞狗肥斯言
如不忘別更無光輝斯言如或忘即安用人為

上留田

父不父兄不兄上留田螿賊生徒陟岡淚崢嶸我欲使
諸凡鳥雀盡變為鶻鷁我欲使諸凡草木盡變為田荆
鄰人歌鄰人歌古風清風生

洛陽塵

昔時昔時洛城人今作茫茫洛城塵我聞富有石季倫
樓臺五色干星辰樂如天樂日夜聞錦姝繡妾何紛紛
真珠簾中姑射神人文金線玉香成暮雲孫秀若不殺
晉室應更貧伊水削行路塚石花磷磷蒼茫金谷園牛

羊齷荆榛飛鳥好羽毛疑是綠珠身

野田黃雀行

高樹風多吹爾巢落深蒿葉暖宜爾依泊莫近鷄類蛛
網亦惡飲野田之清水食野田之黃粟深花中睡埽土
裏浴如此即全勝啄太倉之穀而更穿人之屋

臨高臺

涼風吹遠念使我升高臺寧知數片雲不是舊山來故
人天一涯久客殊未迴鴈來不得書空寄聲哀哀

金史四庫全書
卷一
杞梁妻

秦之無道兮四海枯槩長城兮遮北隅築人築土一萬
里杞梁貞婦啼嗚嗚上無父兮中無夫下無子兮孤復
孤一號城崩塞色苦載號杞梁骨出土疲魂飢魄相逐
歸陌上少年莫相侮

蒿里曲

兔不遲烏更急但恐穆王八駿著鞭不及所以蒿里墳
出戢戢氣凌雲天龍騰鳳集盡為風消土喫狐掇蟻拾

黃金不啼玉不泣白楊騷屑亂風愁月折碑石人莽穢
榛沒牛羊慙宰時見牧童兒弄枯骨

夜夜曲

蟋蟀切切風騷騷芙蓉噴香蟾蜍高孤燈耿耿征婦勞
更深撲落金錯刀

行路難

君不見山高海深人不測古往今來轉青碧淺近輕浮
莫與交地卑只解生荆棘誰道黃金如糞土張耳陳餘

斷消息行路難行路難君自看

擬古離別

離恨如旨酒古今飲皆醉只恐長江水盡是兒女淚伊
余非此輩送人空把臂他日再相逢清風滿天地

戰城南二首

萬里秦乾傍茫茫古蕃壤將軍貌憔悴撫劍悲年長敵
兵尚陵逼久住亦非強邯鄲少年輩個個有伎倆拖鎗
半夜去雪片大如掌

又

磧中有陰兵戰馬時驚蹶輕猛李陵心摧殘蘇武節黃
金鎖子甲風吹色如鐵十載不封侯茫茫向誰說

少年行三首

錦衣鮮華手擎鶻閒行氣貌多輕忽稼穡艱難總不知
五帝三皇是何物

又

自拳五色裘迸入他人宅却捉蒼頭奴玉鞭打一百

又

面白如削玉猖狂曲江曲馬上黃金鞍適來新睹得

夢遊仙四首

夢到海中山入箇白銀宅逢見一道士稱是李八伯

又

三四仙女兒身著瑟瑟衣手把明月珠打落金色梨

又

車溲地無塵行至瑤池濱森森椿樹下白龍來嗅人

又

宮殿崢嶸籠紫氣
金湔玉砂五色水
守閣仙婢相倚睡
偷摘蟠桃幾倒地

輕薄篇二首

繡林錦野春態相壓
誰家少年馬蹄蹋蹋
鬪雞走狗夜不歸
一擲賭却如花妾
誰云不顯不狂
其名不彰悲夫

又

木落蕭蕭蟲鳴唧唧
不覺朱萸臉紅
霜劫鬢漆世途多

事泣向秋日方今少壯不努力老大徒傷悲如何

長安道

憧憧合合八表一轍黃塵霧合車馬火熱名湯風雨利
輾霜雪千車萬馱半宿關月上有堯禹下有夔高紫氣
銀輪兮常覆金闕仙掌捧日兮濁河澄澈愚將艸木兮
有言有言與華封人兮不別不別

富貴曲二首

有金張族驕奢相續瓊樹玉堂雕塙繡轂紈綺雜雜鐘鼓

合合美人如白牡丹花半日只舞得一曲樂不樂足不
足爭教他愛山青水綠

又

如神若仙似蘭同雪樂戒于極胡不知輟只欲更綴上
落花恨不能把住明月太山肉盡東海酒竭佳人醉唱
敲玉釵折寧知耘田車水翁日日炙背欲裂

禪月集卷一

欽定四庫全書

禪月集卷二

唐 釋貫休 撰

古風雜言二十首

古意九首

一雨火雲盡

一雨火雲盡閉門心冥冥蘭花與芙蓉滿院同芳馨佳人天
一涯好鳥何嚶嚶我有雙白璧不羨于虞卿我有徑寸珠別是

天地精玩之室生白滿灑身安輕只應天上人見我雙眼明

陽烏爍萬物

陽烏爍萬物草木懷春恩茫茫塵土飛培壅名利根我
本是蓑笠幼知天子尊學為毛氏詩亦多直致言不慕
需臍類附勢同崩奔唯尋桃李蹊去去長者門

美人如遊龍

美人如遊龍被服金鴛鴦手把古刀尺在彼白玉堂文
章深掣曳珂珮鳴丁當好風吹桃花片片落銀牀何妨

學羽翰遠逐朱鳥翔

乾坤有清氣

乾坤有清氣散入詩人脾
聖賢遺清風不在惡木枝
千
人萬人中一人兩人知憶
在東溪日花開葉落時
幾擬
以黃金鑄作鍾子期

莫輕白雲白

莫輕白雲白不與風雨會
莫見守羊兒或是初平輩
人
生非日月光輝豈常在一
榮與一辱古今常相對
君不

見于公門子孫好冠蓋

古交如真金

古交如真金百煉色不回
今交如暴流倏忽生塵埃
我願君子氣散為青松
我恐荆棘花只為小人開
傷心復傷心吟上高高臺

常思謝康樂

常思謝康樂文章有神力
是何清風清凜然似相識
一種為頑嚚得作翻經石
一種為枯槁得作登山屐
永嘉

為郡後山水添鮮碧何當學羽翰一去觀遺跡

常思李太白

常思李太白仙筆驅造化玄宗致之七寶牀虎殿龍樓
無不可一朝力士脫靴後玉上青蠅生一箇紫皇殿前
五色麟忽然掣斷黃金鎖五湖大浪如銀山滿船載酒
撾鼓過賀老成異物顛狂誰敢和寧知江邊墳不是猶
醉卧

憶在山中時

憶在山中時丹桂花葳蕤紅泉浸瑤草白日生華滋
若屋開地鑪翠牆掛藤衣看經竹窻邊白猿三兩枝東峰
有老人眼碧頭骨竒種薤煮白石旨趣如嬰兒月上來
打門月落方始歸授我微妙訣恬淡無所為別來六七
年只恐白日飛

酷吏詞

霰雨瀟瀟風吼如劊有叟有叟暮投我宿吁歎自語云
太守酷如何如何掠指幹肉吳姬唱一曲等閒破紅束

韓娥唱一曲錦段鮮照屋寧知一曲兩曲訝曾使千人
萬人哭不惟哭亦白其頭飢其族所以祥風不來和氣
不復蝗乎墜乎東西南北

還舉人歌行卷

厚於鐵圍山上鐵薄似雙成仙體纈蜀機鳳雛動雙
珊瑚枝枝撐著月王凱家中藏難掘顏回飢傷愁天雪
古松直筆雷不折雪衣女啄蟠桃缺珮入龍宮步步遲
繡簾銀殿何參差即不知驪龍失珠知不知

陳宮詞

緬想當時宮闕盛，荒宴椒房憺堯聖。
玉樹花歌百花裏，珊瑚牕中海日迸。
大臣來朝酒未醒，酒醒忠諫多不聽。
陳宮因此成野田，耕人犁破宮人鏡。

擬齊梁酬所知見贈二首

靜只焚香坐詠懷，悲歲闌佳人忽有贈。
滿手紅琅玕不獨耀，肌魄將行為羽翰。
酬如上青天風雪空漫漫。

又

美如仙鼎金清如織手琴孫登嘯一聲縹緲不可尋但
覺神洋洋如入三昧林釋手復在手古意深復深慚無
英瓊瑤何以酬知音

經古戰場

茫茫凶荒迴如天設駐馬四顧氣候迂結秋空崢嶸黃
日將沒多少行人白日見物莫道路高低盡是戰骨莫
見地赤碧盡是征血昔人昔人既能忠盡于力身糜戈
戟脂其風膏其域今人何不繩其滕植其食而使空曠

年年常貯愁烟使我至此不能無言

村行遇獵

獵師紛紛走榛莽女亦相隨把弓矢南北東西盡殺心
斷燒殘雲在圍裏鷓拂荒田兔成血竿打黃茅雉驚起
傷嗟箇輩亦是人一生將此闕身已我聞天地之大德
曰生又聞萬事皆天意何遣此人又如此猶更願天公
一丈雪深山麋鹿盡凍死

漁家

赤蘆葢屋低壓恰沙漲柴門水痕疊黃雞青犬花蒙籠
漁父漁兒掃風葉有叟相逢帶秋醉自拔船樁色無媿
前山脚下得魚多惡浪堆中盡頭睡但得忘筌心自樂
肯羨前賢釣清渭終須畫取掛秋堂與爾為鄰有深意

田家作

田家老翁無可作晝甑蒸梨香漠漠只向堦前曝背眠
赤桑大葉時時落古澗侵門桃李密倉囤峨峨欲蔽日
自云孫子解耕耘四五年來腹多實我聞此語心自悲世

上悠悠豈得知稼而不穡徒爾為

江邊祠

松森森江渾渾江邊古祠空閉門精靈應醉社日酒白
龜咬斷菖蒲根花殘冷紅宿雨滴土龍甲濕鬼眼赤天
符早晚下空碧昨夜前村行霹靂

苦熱寄赤松道者

天雲如燒人如炙天地鑪中更何適蟬喘雷乾冰井融
些子清風有何益守羊真人聃之役高吟招隱倚碧壁

紫氣紅烟鮮滴滴澗茗園瓜麴塵色驕奢涼冷合相憶
偶作二首

新詩一千首古錦初下機除月與鬼神別未有人知子
期去不返浩浩良可悲不知天地間知者復是誰

又

門前數支路路路車馬鳴名埃與利塵千里萬里行只
見青山高豈見青山平朱門勢峨峨冠蓋何光明黃鳥
在花裏青蟬奪其聲爾生非金玉豈常貴復貞寄言之

子心可以歸無形

春晚書山家屋壁二首

柴門寂寂黍飯馨
山家烟火春雨晴
庭花濛濛水泠泠
小兒啼索樹上鶯

又

水一作播香塘黑蒲森森
鴛鴦鸕鶿如家禽
前村後壑桑

柘深東鄰西舍無
相侵蠶娘洗蠶前
溪淥牧童吹笛和
衣浴山翁留我宿
又宿笑指西坡瓜
豆熟

春晚閒居寄陳嵩伯

春霖閉門久春色聚庭木一夢辭舊山四鄰有新哭菘
蒲生白水風篁擢纖玉為憶湖上翁花時獨瞑目

長持經僧

嘵嘵長夜坐嘵嘵長早起杉森森不見人聲續續如流
水攢金掙玉吐宮嚙微頭低草木手合神鬼日消三兩
黃金爭得止佛言常持經者可日食三兩金而槁木朽枝一食而已傷
嗟浮世之人善事不曾入耳

茫茫曲

茫茫復茫茫滿眼皆埃塵莫言白髮多莖莖是愁筋未
達苦雕偽及達多不仁淺深與高低盡能生棘榛茫茫
四大愁殺人

古鏡詞上劉侍郎

至寶不自寶照古還照今仙人手胼胝寥泐秋沉沉不
是十二面不是百煉金若非八彩眉不可輒照臨即歸
玉案頭為君整冠簪即居吾君手照出天下心恭聞太

宗朝此鏡當宸襟六合懸清光萬里無塵侵此鏡今又
出天地還得一

送姜道士歸南岳

松品落落雪格索索眼有三角頭峭五岳若不居岳此
處難著藥僮貌蠻名鄙彼葫蘆酒滿擔劣起萬里長風
嘯一聲九貞須拍黃金几落葉蕭蕭闕杳宵送師言了
意未了意未了他時為我致取一部音聲鳥

了仙謠

海中紫霧蓬萊島安期子喬去何早遊戲多騎白騏驎
鬚髮如銀未曾老亦留仙訣在人間齧鏃終言藥非道
始皇不得此深旨遠遣徐福生憂惱紫朮黃精心上苗
大還小還行中寶若師方術棄心師浪似雪山何處討

禪月集卷二

欽定四庫全書

禪月集卷三

唐 釋貫休 撰

古風雜言三十首

循吏曲上王使君

需宿需宿炳爛光合蒸蒸黎民鍾此多福自東自西自
南自北伊飛伊走乳乳良牧和氣無形春光自成大信
不信貽厥無朕需女需女爾亦須語使君為理玄風震

古需女需女爾亦須語我欲喙長三千里枕著玉階奏
明主

古鏡詞

我有一面鏡不磨似秋月上唯金膏香下狀驪龍窟等
閒不欲開醜者多不悅或問幾千年軒轅手中物

懷張為周朴

張周二夫子詩好人太癖更不過嶺來如今頭盡白人
傳禹力不到處河聲流向西周又到處即閉戶逢君方

展眉

張

不知是不是若是即太奇我又聞二公心與人
不同一生長在寂寞中有時狂吟入僧宅錦囊鳥啼荔
枝紅有時冥搜海山腦珊瑚枝動日杲杲聖君在上知
不知赤面濁醪許多好

題弘顛三藏院

儀清態淡雕瓊瑤捲簾瀟灑無塵埃岳茶如乳庭花開
信心弟子時時來灌頂壇嚴伸臨塞三十年功苦拘束
梵僧夢裏授微言雪嶺白牛力深得

師曾受神僧
真言於夢中水精

一索香一爐紅蓮花舌生醍醐初聽唯音寶樓閣如聞
魔王宮殿拉金瓦落次聽妙音大隨求更覺人間萬事
深悠悠四音俱作清且柔愛河濁浪却倒流却倒流兮
無處去碧海含空日初曙

古意代友人投所知

青松雖有花有花不如無貧井泉雖清且無金轆轤客
從遠方來遺我古銅鏡掛之玉堂上如對軒轅聖天龍
睡坤腹土蝕金鬣綠因知燕趙佳人顏似玉不得此鏡

終不闕

聞知已入翰林

天驥頭似鳥儵忽四天下南金色如椹入火不見火吾
交二名士遽立于帝左鳳姿既出世天意囑在我奇哉
子淵頌無可無不可

上裴大夫二首

我有一端綺花彩鸞鳳羣佳人金錯刀何以裁此文

又

我有白雲琴，
朴斲天地精。
俚耳不使聞，
慮同衆樂聽。
指法仙法聲，
聲聖人聲。
一彈四時和，
再彈中古清。
庭前梧桐枝，
颯颯南風生。
還希師曠懷，
見我心不輕。

上劉商州

周邵吁噓氣，
結為禎祥雲。
客從遠方來，
持此將贈君。
時命偶不謬，
授館終南東。
惜惜良吏師，
不寐如老農。
孔孟文之天，
代天有餘功。
代天復代天，
后稷何所從。

閒居擬齊梁四首

夜雨山草滋

夜雨山草滋，爽籟生古木。
閑吟竹仙偈，清於嚼金玉。
蟋蟀啼壞墻，苟免悲局促。
道人優曇花，迢迢遠山綠。

果熟無低枝

果熟無低枝，芳香入屏帷。
故人久不來，萱草何離離。
苦吟齋貌減，更被杉風吹。
獨賴湖上翁，時為烹露葵。

紅藕映嘉魴

紅藕映嘉魴，澄池照孤坐。
池痕放文彩，雨氣增慵惰。
山

翁寄尤藥幸得秋病可終召十七人雲中備香火

清風生滄洲

清氣生滄洲殘雲落林數放鶴久不歸不知更歸否支
策到江湄江皋木葉飛自憐為客遠還如鵲遶枝南枝
復北枝玉露沾毛衣

塞上曲二首

錦袷健兒黑如漆騎羊上冰如箭疾蒲萄酒白雕腊紅
首蒼根甜沙鼠出單于右臂何須斷天子昭昭本如日

一握鬢髻一握絲須知只為平邊術

又

去年轉鬪陰山脚生得單于却放却今年深入于不毛
敵兵拔帳遺弓刀男兒須展平生志為國輸忠合天地
甲穿雖即失黃金劔缺猶能生紫氣塞草萋萋兵士苦
翔風墮指猶控弩封侯十萬始無心玉關凱入君看取

擬齊梁體寄馮使君三首

庭鳥多好音

庭鳥多好音相呼灌木中竹房更何有還如鳥巢空
賴逢富人侯真東晉謝公煌煌發令姿珂珮鳴丁冬故
山有深霞未如旌旆紅慚非衛霍松何以當清風

露益蟬聲長

露益蟬聲長蕙蘭垂紫帶清吟待明月孤雲忽為蓋伊
余石林人本是燒畬輩頻接謝公棊輸多未曾賽

大道貴無心

大道貴無心聖賢為始慕秋空共澄潔美玉同貞素偉

哉桐江守雌黃出金口為文能廢興談道弭空有雪林
槁枯者坐石聽亦久還疑紫磨身成居靈運後

書匡山老僧菴

篔簹紅實好鳥語銀髯瘦僧貌如祖香烟濛濛衣上聚
冥心縹緲一作渺渺入鐵圍白磨作夢枕藤屨東峰山媪貢

瓜乳

讀顧況歌行

雪泥露金冰滴瓦楓檉火著僧留坐忽覩逋翁況別號逋翁也

一軸歌始覺詩魔辜負我花飛飛雪霏霏三珠樹曉珠
纍纍妖狐爬出西子骨雷車拶破織女機憶昔鄱陽寺
中見一碣逋翁詞兮逋翁札庾翼未伏王右軍李白不
知誰擬殺別別若非仙眼應難別不可說不可說離亂
亂離應打折

冬末病中作二首

冬風吹草木亦吹我病根故人久不來冷落如丘園
龍輿摩詰吁嘆非不聞顧惟年少時未合多憂懃風鐘

遠孤枕雪水流凍痕空餘微妙心期共靜者論

又

胸中有一物旅拒復攻擊向下還上來唯疑是肺石山
童頑且小用之復何益教洗煮茶鑄雪團打隣壁宛轉
無好姿徘徊更何適庭前早梅樹坐見花盡碧屋老多
鼠窠窻早露山脊近來胸中物已似輸藥力微吟復微
吟依稀似莊舄

過葉進士

金定巳月合書
卷三
文章擬真宰儀冠冷如壁山寺偶相逢眼青勝山色氣
隆多慷慨語澹無他力金繩殘果落竹閣涼雨滴自媿
龍鍾人見此冲天翼

寄杜使君

清晨捲珠簾盥漱香滿室杉松經雪後別有精彩出琅
函芙蓉書開之向堦日好鳥常解來孤雲偶相失有時
作章句氣概還鮮逸茫茫世情世誰人愛真實清高慕
玄度宴默攀道一殘磬隔風林微陽解冰筆亦知休明

代諒無經濟術門前九箇峰終擬為文乞

寄高員外

冷冽蒼黃風似劈雪骨冰筋滿瑶席庭松流汗相抵喫
霜絮重裘火無力孤峰地鑪燒白樾龐眉道者應相憶
儵忽維陽歲云暮寂寥不覺成章句惟應將寄蕊珠宮

一作人 禪刹雲深一來否

書陳處士屋壁二首

有叟傲堯日髮白肌膚紅妻子亦讀書種蘭清溪東

處士

有種
蘭篇

白雲有奇色紫桂含天風即應迎鶴書
冑羨于洞

洪

又

高步前山前高歌北山北數載賣甘橙
山貲近云足新詩不將出往往僧乞得
唯云李太白亦是偷桃賊吟狂鬼神走
酒釀天地炁青芻生堦除擷之束成束

對月作

今人看此月古人看此月如何古人心
難向今人說古

人求祿以及親及親如之何忠孝為朱輪今人求祿唯
庇身庇身如之何惡木多斜文斜文復斜文顛室何紛
紛

山茶花

風裁日滌開仙圃百花色死猩血謬今朝一朶墮堦前
應有看人怨孫秀

上孫使君

聖主得賢臣天地方交泰恭惟岳精粹多出於昭代君

侯握文鏡獨立塵埃外王演俗容儀崔陵小風槩馨香
擁蘭雪峻秀高嵩岱嵇松領歲寒莊劔無礮淬威稜玉
霜直匠石金槌大詩穿明月珠道拍安期背中興鸞鳳
集直道風雲會萬卷似無書三山如歷塊德乎天所縱
清矣誰堪對有法在朝端無塵到冠蓋具瞻從密勿旦
夕調鼎鼎為君整衢尊為君戢蕃塞豈知吾后意憂此
毗陵最親手賜彤弓蒼生是繫賴下車隣寇散是物冰
壺內龔遂喪廉平次公太繁碎袴襦砧動地父母歌關

闌瑞雪鏢戈鋌非烟遠旌旆寧思子產冰可羨任棠雉
忽如春再來不獨天重戴昂藏海嶠鶴冷碧仙庭檜物
物動和風家家有新態芙蓉開帝幕錦帳無纖罅鼓角
穿凍雲恩波動耕耒奸回改精魄禮教書紳帶必于堯
舜日還似房杜輩野人有章句格力亦慷慨若不入孔
門世間更誰愛

禪月集卷三

欽定四庫全書

禪月集卷四

唐 釋貫休 撰

古風雜言三十首

行路難四首

不會當時作天地剛有多般愚與智到頭還用真宰心
何如上下皆清氣大道冥冥不知處那堪頓得羲和轡
義不義兮仁不仁擬學長生更容易負心為鑪復為火

緣木求魚應且止君不見燒金煉石古帝王鬼火熒熒
白楊裏

又

君不見道傍廢井生古木本是驕奢貴人屋幾度美人
照影來素綆銀餅濯纖玉雲飛雨散今如此綉闥雕甍
作荒谷沸渭笙歌君莫誇不應常是西家哭休說遺編
行者幾至竟終須合天理敗他成此亦何功蘓張終作
多言鬼行路難行路難不在羊腸裏

又

九有茫茫共堯日浪死虛生亦非一清淨玄音竟不聞
花眼酒腸暗如漆或偶因片言隻字登第光二親又不
能獻可替否航要津口譚羲軒與周孔履行不及屠沽
人行路難行路難日暮途遠空悲歎

又

君不見道傍樹有寄生枝青青鬱鬱同榮衰無情之物
尚如此為人不及還堪悲父歸墳兮未朝夕已分黃金

爭田宅高堂老母頭似霜心作數支淚常滴我聞忽如
負芒刺不獨為君空歎息古人尺布猶可縫潯陽義犬
令人憶寄言世上為人子孝義團圓莫如此若如此不
遑死兮更何俟

泊秋江

岸如洞庭山似剡船漾清溪涼勝簟月白風高不得眠
枯葦叢邊釣師魔

嘲商客

葦蕭蕭風撼撼落日江頭何處客斜倚帆檣不喚人五
湖浪向心中白

寄王滌

梅月多開戶衣裳潤欲滴寂寥雖無形不是小讎敵地
虛草木壯雨白桃李赤永日無人來庭花苦狼籍吟高
好鳥覩風靜茶烟直唯思菜子來衣拖五般色

上馮使君五首

撐船碧江上春日何遲遲汀花最深處拾得鴛鴦兒

又

漁父無憂苦水仙亦何別眠在綠葦邊不知釣筒發

又

樵叟無憂苦地仙亦何別茆屋岸花中弄孫頭似雪

又

扣舷得新詩茶煮桃花水薜薜數片帆去去殊未已

又

仁政無不及乳獺將子行誰家苦竹林中有讀書聲

擬君子有所思二首

我愛正考甫思賢作商頌我愛揚子雲理亂皆如鳳振
衣中夜起露花香旖旎撲碎驪龍明珠敲出鳳凰五
色髓陋巷蕭蕭風淅淅緬想斯人勝珪璧寂寥千載不
相逢無限區區盡虛擲君不見沈約道佳人不在茲春
光為誰惜

又

安得龍猛筆點石為黃金

西岳龍猛大士於硯中磨藥
點筆成金西天有龍猛金其

色散為酷吏家使無貪殘心甘棠密葉成翠幄歎鳳不
來天地塞所以傾國傾城人如今如今不可得

古塞下曲四首

古來沙漠地勁旅聚如蠅寒鵬中髣石落在黃河冰蒼
茫邏逆城枿枿賊氣興鑄金禱秋穹還擬相憑陵

又

戰一作白骨踐成一作化黃塵飛入征人目黃雲一作塵忽變黑

戰鬼作陣一作夜哭陰風吼大漠火號出不得誰為天子

前唱此邊城曲

又

日向平沙出還向平沙沒飛蓬落軍營驚鴈去天末帝
鄉青樓倚霄漢歌吹掀天對花月豈知塞上望鄉人日
日雙眸滴清血

又

狼烟在陣雲匈奴愛輕敵領兵不知數牛羊復吞磧巖
冬大河枯嫖姚去深擊戰血染黃沙風吹映天赤

鼓腹曲

我昔不幸兮遭百罹蒼蒼留我兮到好時耳聞鐘鼓兮
生豐肌白髮却黑兮自不知東隣老人好吹笛倉囤峨
峨穀多赤餅紅鰕兮析麋腊有酒如濁醪兮呼我喫往
往醉倒潢沓之水邊兮人盡識孰云六五帝兮四三皇
如夔如龍兮如龔黃吾不知此之言兮是何之言兮

經曠禪師院

吾師楞伽山中人氣岸古淡僧麒麟曹溪老兄一與語

金玉聲利泥棄唾委兀兀如頑雲驪珠兮固難價其價
靈芝兮何以根其根真貌枯槁言朴略衲衣爛黑燒岳
痕憶昔十四五年前苦寒節禮師問師楞伽月此時師
握玉麈尾報我却云非日月一敲粉碎狂性歇庭松無
韻冷撼骨搔窻擦簷數枝雪邇來流浪于吳越一片閒
雲空皎潔再來尋師已蟬蛻蒼筤荀枝枯醴泉竭水檀香
火遺影在甘露松枝月中折

師去世有甘露降于庭松

寶師往日真

隱心今日不能墮雙血

邊上作三首

山無綠兮水無清風既毒兮沙亦腥
羌兒走馬疾飛鳥
聯翩射落雲中聲

又

陣雲忽向沙中起探得遼兵過遼水
堪嗟護塞征戍兒
未戰已疑身是鬼

又

見說青塚穴中有白野狐時時出沙磧
向東而號呼號

呼復號呼畫師圖得無

送張拾遺赴施州司戶

道之大道古太古二字為名爭莽鹵社稷安危在直言
須歷堯堦樞諫鼓恭聞吾皇至聖深無比推席却几聽
至理一言偶未合堯聰賈生須看湘江水君不見頃者
百官排闥赴延英陽城不死存令名又不見仲尼遙竒
司馬子珮玉垂紳合如此公乎公乎施之掾江上春風
喜相見畏天之命復行行芙蓉為衣勝絕絹好音入耳

應非久三峽聞獨莫迴首且吸千年美醉巴酒

書倪氏屋壁三首

茶烹綠乳花映簾撐沙苦筍銀纖纖窻中山色青翠粘
主人於我情無厭

又

白桑紅椹鷺咽咽麵揉玉麈餅挑雪將為數日已一月
主人於我特地切

又

水嬌艸媚掩山路睡樣鴛鴦如畫作春光靄靄忽已暮
主人剛地不放手

續姚梁公座右銘

并序

愚嘗覽白太保所作續崔子玉座右銘一首其
詞旨乃典乃文再懇再切實可警策未悟貽厥
將來又見姚崇下蘭張說李邕皆有斯文尤為
奧妙其于東勗婉婉乃千古之鑒戒資腴矣愚
竊愛其文惟恨世人不能行之十得一二一日

抽毫遂作續白氏之續命曰續姚梁公座右銘
一首雖文經理緯不逮於羣公而亦可書於屋

壁云

善為爾諸身行為爾性命禍福必可轉莫憇言前定見
人之得如已之得則美無不克見人之失如已之失是
亨貞吉反此之徒天鬼必誅福先禍始好殺滅絕不得
不止守謙寡慾善善惡惡不得不作無見貴熱諂走釐
釐無輕賤微上下相依古聖著書矧矧孽孽忠孝信行

越食逾衣生天地間未或非假身危彩虹景速奔馬胡
不自強將升玉堂胡為自墜言虛行偽豔殃爾壽須戒
酒腐爾腸須畏勵志須至撲滿必破非莫非於飾非過
莫過於文過及物陰功子孫必封無恃文學是司竒薄
患隨不忍害逐無足一此一彼諧宮合徵親仁下問立節
求已惡木之陰匪陰盜泉之水匪水世乎草草能生幾
幾直須如冰如玉種桃種李嫉人之惡酬恩報義忽已
之慢成人之美毋擔虛譽無背至理恬和穩暢冲融終

始天人之行盡此而已丁寧丁寧戴髮含齒

上盧少卿覓千文

荆山有美玉含華尚炳爛堪為聖君璽堪為聖君案草
木潤不彫烟霞覆不散野人到山下仰視星辰畔倘或
如粟黃保之上霄漢

謝盧少卿惠千文

廬山有石鏡高倚無塵垢晝景分烟蘿夜魄侵星斗苞
含物象列搜照魚龍吼寄謝天地間毫端皆我有



禪月集卷四

欽定四庫全書

集部

禪月集卷

五至
十

詳校官司業臣納麟寶

檢討臣何思鈞覆勘

總校官進士臣朱鈐

校對官待詔臣胡士震

謄錄監生臣王志遠

欽定四庫全書

禪月集卷五

唐 釋貫休 撰

古風雜言二十二首

大蜀皇帝壽春節進堯銘舜頌二首

堯銘

金冊昭昭列聖孤標仲尼有言魏魏帝堯承天眷命罔
厥矜驕凶德炎炎堦奠不凋永孚于休垂衣飄飆吾皇

則之小心翼翼秉陽亭毒不遑暇食土堦苔綠茅茨雪
滴君既天賦相亦天錫德輶金鏡以聖繼聖漢高將將
太宗兵柄吾皇則之日新德盛朽索六馬罔墜厥命熙
熙蓼蕭塊潤風調舞擎干羽囿入芻蕘既玉其葉亦金
其枝葉葉枝枝百工允釐享國如堯不疑不疑

舜頌

高高歷山有黍有粟皇皇大舜合堯玄德五典克從四
門伊穆大道將行天下為公臨下有赫選賢用能吾皇

則之無數無逸綏厥品彙光光得一千幅臨頂十在隨
蹕大哉大同為光為龍吾皇則之聖謀隆隆納隍孜孜
孜孜切切六宗是禋五瑞斯列排麟環鳳披香立雪四
方納賚九圍一作有截昔救世師降生竺乾壽春亦然
萬年萬年

大蜀高祖潛龍日獻陳情偈頌

有叟有叟居岳之室忽振金湯下彼巉岬聞蜀風景地
寧得一富人侯王旦奭摩詰龍角日角紫氣盤屈揭日

月行符湯禹出天步孔艱橫流犯躡穆穆蜀俗整整師
律鬚髮垂雪忠貞貫日四人蘓活萬里豐謚無雨不膏
有露皆滴有叟有叟無實行實一瓶一衲既朴且質幸
蒙顧盼詞煖思鬱軒鏡光中願如善吉

寄大願和尚

道朗居太山達磨住熊耳手擎清涼月靈光溢天地盡
騎金師子去世久已矣吾師隱廬岳外念全剝削擲孔
聖之日月相空王之素籥曾升麟德殿譚無著賜衣三

銖讓不著

太平裴相公與師詩云竟辭聖
主宮中詔來赴遺民社內期

唯思紅泉白

石閣因隨裴楷離京索

時裴公出守鍾
陵與師同行

邇來便止於匡

霍瀑布千尋噴冷烟旃檀一枝翹瘦鶴峴首故人清信

在千書萬書取不諾

裴公鎮襄陽頻使
迎取師堅不往

徵人昔為門下

人扣玄珮惠無邊垠自憐亦是師子子未逾三載能嘖

呻

江西三載
誦法華經

一從散席歸寧後溪寺更有誰相親青山

古木入白浪赤松道士為東隣焚香西望情何極不及

曇洗淚空滴

說遠公弟子
常在左右

桐江太守社中人還送郝超

米千石

昔郝鑿送米入山與道安

寶書遽掩修章句萬里空函亦何

益終須一替辟虵人未解融神出空集

匡山神為遠公侍者開辟虵人

入師曾開書不知何緣得相見惟冲融無相而會耳

上顧大夫

碧海漾仙洲驪珠外無寶一岳倚青冥羣山盡如草君
侯聖朝瑞動只關玄造誰云倚天劍含霜在懷抱誰云
青雲險門前是平道洪民亦何幸里巷清如掃至化無
經綸至神無祝禱即應炳文柄孤平去浩浩即應調鼎

味比屋堪封保野人慕正化來自海邊島經傳髻裏珠
詩學池中藻閉門十餘載庭杉共枯槁今朝投至鑿得
不傾肝腦斯文如未精歸山更探討

寒月送玄士入天台

之子逍遙塵世薄格淡於雲語如鶴相見唯談海上山
碧側青斜冷相杳芒鞋竹杖寒凍時玉霄忽去非有期
僮擔赤籠密雪裏世上無人留得之想入紅霞路深邃
孤峰縱嘯仙聽起星精聚觀泣海鬼月湧薄烟花點水

送君丁寧有深旨好尋佛窟遊銀地

佛窟銀地造天台雲境也

雪眉

衲僧皆正氣伊昔貞白先生同此意若得神聖之藥即
莫忘遠相寄

上杜使君

為魚須處海為木須在岳一登君子堂頓覺心寥廓右
聽青女鏡左聽宣尼鐸政術似蒲盧詩情出冲漠從來
苦清苦近更加澹薄訟庭何所有一隻兩隻鶴烟霞色
擁牆未黍香侵郭嚴霜與美雨皆從二天落蒼生苦瘡

瘼如何盡消削聖君新雨露更作誰恩渥即捉五色筆
密勿金鑿角即同房杜手把乾坤索籥休說卜圭峰開
門對林壑

送僧入馬頭山

馬頭寶峰秀塞寒空有叟有叟真隱其中無味醞醞亦
非般若白趾碧目數百瀟灑苦竹大於杉白熊臥如馬
金鐘撼壑布水噴瓦芙蓉堂開峰月入岳精踏雪立屋
下伊余解攀緣已是非常者更有叟獨往來與我語情

無剛彊氣透今古竹笠援補芒鞋藤乳北風倒人乾雪
不聚滿頭霜雪湯雪去湯雪去無人及空望真氣江上
立

上盧使君

夔龍在廟堂雖然有僉議蒼生得父母自是天之意都
陽氣候正文物皆鮮媚金鏡有餘光春風少閒地膺門
倚寒碧到者寧容易賓從皆鳳毛爪牙悉猿臂樓臺千
萬戶錦繡龍歌沸大惠蟲鳥全至嚴龍虎畏可憐召伯

樹婆娑不勝翠詩搜日月華道曠神仙味嘉樹白雀來
祥烟甘露墜中川一帶香闕開幽邃地逸少情有餘東
山境不啻恭聞聖天子廊廟猶虛位應知黎庶心只恐
徵書至

送顥雅禪師

霜鋒辟石鳥雀聚帆凍陰飈吹不舉芬陀利香釋麟虎
幡幢冒雪爭迎取春光主芙蓉堂窄堆花乳手提金桴
打金鼓天花娉婷下如雨狻猊座上師子語苦却樂樂

却苦盧至黃金忽如土

和楊使君遊赤松山

為郡三星無一事龔黃意外攀喬松日邊揚歷不爭路
雲外苔蘚須留蹤溪月未落漏滴滴隼旻已入山重重
捫蘿蓋輸山屐伴駐旆不見朝霞濃乳猿劇點掛險樹
露朮翠脆生諸峰初平謝公道非遠黯然物外心相逢
石羊依稀齧瑤草桃花彷彿開仙宮終當歸補吾君袞
好山好水那相容

送崔使君

柳門柳門芳草芊綿日日日黯然黯然子牟戀闕歸
闕王粲下樓相別食實得地頗淹歲月今朝天子在上
合雪必雪況絳之牧文行炳潔釋謂緣因久昵清塵王
嘉迎安遠狎遺民媿彼二子厥或相似論文不文話道
無滓士有貴逼勢不可過麟步規矩鳳翥昂枿峴首仁
蹤項頻跋商雲乳麝香可撮望塵一氣連紫闥吾皇必

用整乾坤莫忘江頭白頭達

白頭達事
見高僧傳

杜侯行

并序

愚自江東兵荒之後受杜氏兄弟深知往曾見
陳陶與撫州蔡京使君雜言曰蔡氏行今亦擬
之曰杜侯行云耳

天目連天搏秀氣崢嶸作起新城地德門鍾秀光盛時
三虎八龍皆世瑞頃者天厖亂下鯨翻海烽火崩騰照
行在江表唯傳君子營劍衝牛斗疏真宰金昆玉季輕
三鼓煮海懸魚臣節若鴈影參差入瑞烟荆花燦爛開

仙圃我聞大中咸通真令主相惟大杜兼小杜但能致
君活國濟生人亦何必須踏金梯折桂樹宣宗懿宗調
舜琴大杜小杜為殷霖出將入相兮功德深生人受賜
兮直至今杜侯兄弟繼之後璞玉渾金美騰口常言一
呼百萬何足云終取封侯之印大如斗恭聞吾皇似堯
禹搜索賢良皆面覩杜侯杜侯君儻修令德克有終即
必還為大杜兼小杜人之戴兮天筆註國之福兮天固
祚四海無波八表臣如今而後君看取

偶作五首

誰信心火多，多能焚大國。誰信鬢上絲，莖莖出蠶腹。嘗
聞養蠶婦，未曉上桑樹。下樹畏蠶飢，兒啼亦不顧。一春
膏血盡，豈止應王賦。如何酷吏酷，盡為搜將去。蠶蛾為
蝶飛，偽葉滿空枝。冤梭與恨機，一見一沾衣。

又

機生機巧生巧心，鑊烘烘日煎炒。闕蜀眉，嚙遊海島扶
桑椹，熟金烏飽金烏飽。飛復飛，四天下人眼眈眈。

又

孰云我輕薄石頭如何喚作玉孰云我是非隨邪逐惡
又爭得古人終不事悠悠一言道合死即休豈不見大
鵬點翼蓋十洲是何之物鳴啾啾

又

君子食即食何必在珍華小人食不食縱食如泥沙清
歌且莫唱妙舞亦休誇爾非鳳炙麒麟肉焉能一掛于
齒牙去來去來歸去來紅泉正灑芙蓉霞

又

君不見金陵風臺月榭烟霞光如今五里十里野火燒
茫茫君不見西施綠珠顏色可傾國樂極悲來留不得
君不見漢王力盡得乾坤如何秋雨灑廟門銅臺老樹
作精魅金谷野狐多子孫幾許繁華幾更改唯有堯舜
周召孔孟似長在坐看樓閣成丘墟莫話桑田變成海
吾有清涼雪山雪天上人間常皎潔茫茫慾火欲燒人
惆悵無因為君說

山中作

山為水精宮藉花無塵埃吟狂岳似動筆落天瓊瑤伊
余自樂道不論才不才有時鬼笑兩三聲疑是大謝小
謝李白來

聞前王使君在澤潞居

為善無近名竊名者得聲不如心誠哉是言也使君聖
朝瑞乾符初刺婺德變人性靈筆變人風土烟霞與蟲
鳥和氣將美雨千里與萬里各各來相附信哉有良吏

玄識應百數

東陽古者相傳有記云刺史滿一百即有好刺史來後有大寇至使君來正當一百

人兩年後果有黃賊來公避地遠去

古人古人自古人今日又見民歌六

七袴不幸大寇崩騰來孤城勢孤固難錮攀轅既不及
旌旆衝風露大駕已西幸飄零何處去嫠人空悲哀對
生祠泣沾莓苔忽聞暫寄河之北兵強四面無塵埃唯
祝鑿輿早歸來用此咎繇仲虺才使四野霧廓八紘鏡
開皇天無親長與善隣宜哉宜哉

將入匡山別芳晝二公二首

噴嵐堆黛塞寒碧
窻前古雪如白石
臨岐約我來不來
若來須撥紅霞覓

又

紅豆樹

一作花

閒滴紅雨戀師
不得依師住
世情世界愁

殺人錦繡谷中歸
舍去

禪月集卷五

欽定四庫全書

禪月集卷六

唐 釋貫休 撰

古風雜言三十首

送楊秀才

北山峨峨香拂拂翠漲青奔勢巉崒赤松君宅在其中
紫金為牆珠作室玻璃門外仙傲睡幢節森森絳烟密
水精簾捲桃花開文錦娉婷衆非一撫長離坎答鼓花

姑吹簫弄玉起舞三萬八千為半日海涸鼇枯等閒觀
愛共安期碁苦識彭祖祖有時朝玉京紅雲擁金虎石
橋亦是神仙住一作柱白鳳飛來又飛去五雲縹緲羽翼
高世人仰望心空勞

別杜將軍

伊余本是胡為者採葦鋤茶在窮野偶披蓑笠事空王
餘力為文擬何謝少年心在青雲端知音滿地皆鳳鸞
遽逢天步艱難日深藏溪谷空長歎偶出重圍遇英哲

留我江樓經歲月身隈玉帳香滿衣夢歷金盆

金華山最高處

雨和雪東風來兮歌式微深雲道人召來歸燕辭大廈
兮將何為濛濛花雨兮鷺飛飛一汀楊柳同依依

送夢上人歸京

伊余龍鍾歸海涯千山萬水情自怡夢公別我還上國
江邊慘執行遲遲向我道雲中覓伴未得伴又示我數
首新詩盡是詩只恐不如此若如此如此即須天子知
蕭蕭金吹荆門口槐菊鬪黃落葉走前程勝事未可涯

但恐圭峰難入手蓮峰掌記韓拾遺鴈行雍穆世所稀
二十年前即別離憑師一話吟朝飢

問岳禪師疾

世病如山岳世醫皆拱手道病如金鎖師遭鎖鎖否大

為世病無為無事為道病如金鎖伊昔芙蓉頰談經似主涉蘓合晝氤氳

天花似飛蝶覺樹垂實魔輩刺疾病也不問終不斂膝

師唯坐不臥也春光冉冉不上爾質東風浩浩謾入爾室云何

斯人而有斯疾

上荆南府主三讓德政碑

明明赫赫中興主動納諸隍冠前古四海英雄盡戢兵
皆如圮圮一作
砣砣天金柱萬姓多論政與德請樹豐碑似

山岳一從寇滅二十年琬琰雕鏤賜重疊荆州化風何
卓異寡欲無為合天地雖立貞碑與衆殊字字皆是吾
皇意君侯捧碑西拜泣臣且何人恩洊及鳳凰一作
詔銜

下雕龍文德昧政虛爭敢立函封三奏心匍匐堅讓此
碑聲蓋國我恐江淹五色筆作不立此碑之碑文不得

施萬病丸

我聞昔有海上翁鬚眉皎白塵土中葫蘆盛藥行如風
病者與藥皆惺忪藥王藥上親兄弟救人急於已諸體
玉毫調御徧讚揚金輪釋梵咸歸禮賢守運心亦相似
不吝親親拘子子曾聞古德有深言由來大士皆如此

甘雨應祈

春雨偶愆期草木亦未覺君侯不遑處退食或閉閣東
海浪滔滔西江波漠漠得不願身為大虬金其角玉其

甲一吸再唾雲平霧匝華暢九有清傾六合使不蘓者
蘓不足者足情通上玄如膏綿綿有叟有叟鼓腹歌於
道邊歌曰麥苗芄芄兮鶴鷓飛日出而作兮日入歸如
彼草木兮雨露肥古人三樂兮我樂多之天之成兮地
之平兮柘系黃兮瓠葉青兮乳女啼兮蒸黍馨兮炙背
捫虱兮復何經營兮

寄韓團練

真宰動洪鑪萬物皆消息唯有三珠樹不用東風力君

子天廟器頭骨何巉崩海內久聞名江西偶相識誰不
有詩機麟龍不解織誰不有心地蘭茝不曾植多君二
俱作獨立千仞壁話道出先天憑師動臻一作極青霄
鴈行律紅露荆花滴偶然成遠別別後長相憶行至鄱
陽郡又見謝安石留我遇殘冬身心苦恬寂江上春又
至引頸山空積何日再相逢天香滿瑤席

春野作五首

閒步淺青平綠流水征車自逐誰家挾彈少年擬打紅

衣啄木

又

山花雨打盡滿地如爛錦
遠尋鷓鴣雞拾得一團草

又

大牛苦耕田乳犢望似泣
萬事皆天意綠草頭叢叢

又

斜陽射破塚鬪體半出地
不知誰氏子猶自作意氣

又

牛兒小牛女少拋牛沙上鬪百草鉏隴老人又太老薄
烟漠漠覆桑棗戴嵩醉後取次掃

深山逢老僧二首

衲衣線麓心似月自把短鋤鋤楮杻青石溪邊踏葉行
數片雲隨兩眉雪

又

山童貌頑名乞乞放火燒畬采崖蜜擔頭何物帶山香
一籬白葦一籬栗

道情偈

草木亦有性與我將不別我若似草木成道無時節世
人不會道向道却嗔道傷嗟此輩人寶山不得寶

懷二三朝友

傷心復傷心流光似飛電有惠驪龍十斛珠不如一見
君子面愁人復愁人滿眼皆埃塵有惠黃金一萬斤不
如一見於仁人我昔讀詩書如今盡拋也只記得田叔
孟溫舒帝王滿口呼長者

偶作

君子稱一善馨香遍九垓小人妒一善處處生
嫌猜口如暴死人鐵尺拗不開稂莠蝕田髓積陰成冬雷因知
咋舌人千古空悠哉

義士行

先生先生不可遇愛平不平眉斗豎黃昏雨電空似鬚
別我不知何處去

觀懷素草書歌

張顛顛後顛非顛直至懷素之顛始是顛師不譚經不
說禪筋力唯于草書朽顛狂却恐是神仙有神助兮人
莫及鐵石畫兮墨須入金樽竹葉數斗餘半斜半傾山
衲溼醉來把筆獍如虎粉壁素屏不問主亂拏亂抹無
規矩羅刹石上坐伍子胥崩通八字立對漢高祖勢崩
騰兮不可止天機暗轉鋒鋌裏閃電光邊霹靂飛古栢
身中潭龍死駭人心兮目眈音前瞋音旭頓人足兮神辟易
乍如沙場大戰一作戰敗後斷槍槩箭一作斷皆狼籍又似

深山朽石上古病松枝掛鐵錫月兔筆天竈墨斜鑿黃
金側剉玉珊瑚枝長大束束天馬驕獍不可勒東却西
南又北倒又起斷復續忽如鄂公喝住單雄信秦王肩
上剃著棗木槩懷素師懷素師若不是星辰降瑞即必
是河岳孕靈固宜須冷笑逸少安得不心醉伯英天台
古杉一千尺崖崩劍折何崢嶸或細微仙衣半折金線
垂或妍媚桃花半紅公子醉我恐山為墨兮磨海水天
與筆兮書大地乃能略展狂僧意常恨與師不相識一

見此書空歎息伊昔張渭任華葉季良數子贈歌豈虛
飾所不足者渾未曾道著其神力石橋被燒燒良玉土
不蝕錐畫沙兮印印泥世人世人爭得測知師雄名在世
間明月清風有何極

送盧舍人三首

一曰勸君不用登峴首山讀羊祜碑男兒事業須自奇
此碑山頭如日月日照人人不知人不知青山白雲
徒爾為

又

二曰勸君登商山不用覓商山皓雲深雪深騾馬倒我
願終南太華變為金吾后見之不為寶我願九州四海
紙幅幅與君為諫草使躡高踐夔逢軒見皦日環五色
是物得老如此即商山皓商山皓君不用討他他必來
相討

又

三曰君不見釋梵諸天壽億垓天上人間去復來君又

不見紫金為輪一千幅寶洲闕四皆臣伏輪王釋梵作

何因祇是弘隆大乘福自古皇王與賢哲頂敬心師刻

金玉報通三世釋迦言莫將梁武為題目君不見近代

韋裴蔣與蕭

韋處厚相國出入廟堂禮佛如朝見君父裴休相國師事空王信敬無比出將入相

偏重禪門蔣闕相國牆壑空門為大檀越中書藩鎮常事天王蕭倣相國清德冠世白業常修為佛骨碑見行

於當世

文房書府師百僚代天理物映千古布髮掩泥非

一朝大哉釋梵輪王璞已矣何人繼先覺行行珍重

寄斯言斯言不是尋常曲

宿深村

行行一宿深村裏
雞犬豐年鬧如市
黃昏見客合家喜
月下取魚戽塘水

黃鸝

一種為春禽
花中開羽翼
如何此鳥身
便是黃金色
黃金色黃
金色若逢竹
實終不食

送越將歸會稽

面如玉盤身八尺
燕語清癯戰袍窄
古獄龍腥一匣霜

江上相逢雙眼碧
冉冉春光方婉婉
黯然別我歸稽嶽
他年必帥邯鄲兒
與我殺輕班
定遠

別仙客

巨鼇頭縮翻仙翠
蟠桃爛落珊瑚地
浪濺霓旌溼鵬翅
略別千年太容易

寒江上望

荒岸燒未死
白雲癡不動
極目無人行
浪打取魚籠

讀唐史

我愛李景伯內宴執良規君臣道昭彰天顏終熙怡大
簸怕清風糠粃繚亂飛洪鑪烹五金黃金終自竒大哉
為忠臣捨此何所之

樵叟

樵父貌飢帶塵土自言一生苦寒苦擔頭擔箇赤瓷甕
斜陽獨立朦朧塢

禪月集卷六

欽定四庫全書

禪月集卷七

唐 釋貫休 撰

五言律詩三十一首

春山行

重疊太古色濛濛
花雨時好峰行恐
盡流水語相隨黑
壤生紅朮黃猿領
白兒因思石橋月
曾與故人期

送諫官南遷

危行危言者從天落海涯如斯為遠客始是好男兒瘴
雜交州雨犀指馬援碑不知千萬里誰復識辛毗

懷香爐峰道人

常思峰頂叟石窟土為牀日日先見日烟霞多異香冥
心同槁木掃雪帶微陽終必相尋去斯人不可忘

觀李翰林真二首

日角浮紫氣凜然塵外清雖稱李太白知是那星精御
宴千鍾飲蕃書一筆成宜哉杜工部不錯道騎鯨

又

誰氏子丹青毫端曲有靈
砒如山忽墮爽似酒初醒
天馬難攏勒仙房久閉扃
若非如此輩何以傲彤庭

晚泊湘江作

烟浪濛秋色高吟似有隣
一輪湘渚月萬古獨醒人
岸溼穿花遠風香禱廟頻
祇應諛佞者到此不傷神

淮上逢故人

故園離亂後十載始逢君
長恨南薰奏尋常只自聞
荒

窗秋見岳赤地夜生雲莫歎謀身晚中興正用文

讀杜工部集二首

造化拾無遺唯應杜甫詩豈非玄域橐

一作橐

奪得古人

旗日月精華薄山川氣概卑古今吟不盡惆悵不同時

又

甫也道亦喪孤身出蜀城彩毫終不擬白雪更能輕命
薄相如命名齊李白名不知耒陽令何以葬先生

題簡禪師院

機忘室亦空靜與沃州同惟有半庭竹能生竟日風思
山海上月出定印香終繼後傳衣者還須立雪中

讀劉得仁賈島集二首

二公俱作者其奈亦迂儒且有諸峰在何將一第吁句
還如菑菑誰復贈襜褕想得重泉下依前與衆殊

又

役思曾衝尹多言阻國親桂枝何所直陋巷不勝貧馬
病唯湯雪門荒劣有人伊余吟亦苦為爾一眉顰

天台老僧一首

獨住無人處，松龕岳雪侵。
僧中九十臘，雲外一生心。
白髮垂不剃，青眸笑更深。
猶能指孤月，為我暫開襟。

經費隱君舊宅

巉巖玉九株，秀濕掩蒼梧。
祥瑞久不出，羲軒消得無。
雨和高瀑濁，燒燼大樗枯。
到此思歸去，迢迢隔五湖。

秋末懷舊山

昔住匡廬北，無人知姓名。
侵雲收穀粟，引蟻上柑橙。
寒

雨雪兼落枯林虎獨行誰能將白髮共向此中生

春過鄱陽湖

百慮片帆下風波極目看吳山兼鳥沒楚色入衣寒過
此愁人處始知行路難夕陽沙島上回首一長歎

寄僧野和尚

鳥

一作
島

外更誰親諸峰即四隣白頭寒枕石青衲爛無
塵橡栗堆行逕猿猴遠定身儻然重結社願作掃壇人

寄馮使君



端居碧雲暮好鳥啼紅芳滿郭桃李熟捲簾風雨香清
吟繡段句默念芙蓉章未得歸山去頻升謝守堂

寄紫閣隱者

積翠藏一叟常思未得遊不知在巖下為復在峰頭苔
上枯藤筧泉淋破石樓伊余更何事不學此翁休

寄天台道友

大是清虛地高吟到日晡水聲金磬亂雲片玉盤麕仙
有遺蹤在人還得意無石碑文不直壁畫色多枯冷立

千年鶴閒燒六一爐松枝垂似物山勢秀難圖紫府程
非遠清溪逕不迂馨香柏上露皎潔水中珠賢聖無他
術圓融只在吾寄言桐柏子珍重保之乎

旅中懷孫路

暮塵微雨收蟬急楚鄉秋一片月出海幾家人上樓砌
香殘果落汀草宿烟浮唯有知音者相思歌白頭

貽世

至理不誤物悠悠自不明黃金燒欲盡白髮火邊生苦

金定四石 卷七
感神仙謔難收日月精捕風兼繫影信矣不須爭

覽李秀才卷

香沐整山衣開君一軸詩吟當秋景苦味出雪林遲經
濟幾人到工夫兩鬢知因嗟和氏淚不是等閒垂

懷方干張為

冥搜入仙窟半夜水堂前吾道祇如此古人多亦然螢
沉荒塢霧月苦綠梧蟬因憶垂綸者滄浪何處邊

四皓圖

何人圖四皓如語話
嘵嘵雙鬢雪相似是誰年
最高溪苔連豹褥
仙酒汙雲袍想得忘
秦日伊余亦合逃

懷白閣道侶

寒思白閣層石屋
兩三僧斜雪掃不盡
饑猿喚得麝香燃
一字火磬過數潭
冰終必相尋去孤
懷久不勝

讀孟郊集

東野子何之詩人始見詩
清剗霜雪髓吟動鬼神
司舉世言多媚無人師
此師因知吾道後冷淡
亦如斯

懷四明亮公

孤峰含紫烟師住此安禪不下便不一作石下如斯太可

憐坐侵天井黑吟久海霞鳶豈覺塵埃裏干戈已十年

秋過錢塘江

巨浸東隅極山吞大野平因知吳相恨不盡海濤聲黑
氣騰蛟窟秋雲入戰城遊人千萬里過此白髭生

上俞許二判官

近拋蓑笠者急善遇休明未許親宗伯焉能識正聲病

容經夏在岳夢入秋并無限林中意今逢許郭傾

懷劉得仁

詩名動帝畿身謝亦因詩白日只如哭皇天得不知旅
墳孤躑岳羸僕泣如兒多少求名者間之淚盡垂

禪月集卷七

欽定四庫全書

禪月集卷八

唐 釋貫休 撰

五言律詩三十一首

歸故林後寄二三知己

昨別楚江邊
逡巡早數年
詩雖清到後
人更瘦於前
岸翠連喬嶽
汀沙入壞一作田
何時重一見
談笑有茶烟

春寄西山陳陶

金定四庫全書
卷八
搔首復搔首孤懷草萋萋春光已滿目君在西山西
水成文去庭柯擎翠低所思不可見黃鳥花中啼

秋末江行

四顧木落盡扁舟增所思雲衝遠燒出帆轉大荒遲天
際霜雪作水邊蒿艾衰斷猿不堪聽一聽亦同悲

送人歸新羅

昨夜西風起送君歸故鄉積愁窮地角見日上扶桑海
氣生初霽潮痕匝亂荒從茲頭各白魂夢一相望

思匡山賈匡

山兄詩癖甚寒夜更何為覓句唯頑坐巖霜打不知
石膏粘木屐崖蜜落冰池近見禪僧說生涯勝徃時

偶作

十載獨扃扉唯為二雅詩道孤終不雜頭白更何疑句
冷杉松與霜巖鼓角知修心對閒境明月印秋池

贈方干

盛名與高隱合近謝敷村弟子已得桂先生猶灌園垂

綸侵海介拾句歷雲根白日昇天路如君別有門

弟子謂李

也類

漁父

一葉一竿竹眉鬚雪欲零陸應無祖業香必是伊腥兒

亦名魚鷓歌稱我

一作爾

洞庭回頭深自媿舊業近滄溟

題友人山居

卜居隣塢寺魂夢又相關鶴本如雲白君初似我閒月

明僧渡水木落火連山從此天台約來茲未得還

寄宋使君

寺倚烏龍腹窗中見碧稜空廊人畫祖古殿鶴窺燈風
吼深松雪壚寒一鼎冰唯應謝內史知此道心澄

懷武夷紅石子二首

常思紅石子獨自住山椒窗外猩猩語壚中妣妣嬌乳
香諸洞滴地秀衆峰朝曾見竒人說烟霞恨太遙

又

弋者終何慕高吟坐綠黿燒侵薑芋客僧與水雲袍竹

卷八
鞘奮刀缺松枝獵箭牢何時一相見清話擘蟠桃

送人征蠻

七縱七擒處君行事可攀亦知磨一劍不獨定諸蠻樹
盡低銅柱潮常沸火山名須麟閣上好去及瓜還

懷周朴張為

二子無消息多應各自耕巴江思杜甫漳水憶劉楨白
髮應全白生涯作麼生寄書多不達空念重行行

寄令狐郎中

雨打繁暑盡放懷步微涼綠苔狂似人入我白玉堂
鳥眠堪畫庭檉夜益香唯應藥宮子時到虎溪傍

鄱陽道中作

鄱陽古岸邊無一樹無蟬路轉他山大砧驅鄉思偏湖
平帆盡落天淡月初圓何事堯雲下干戈滿許田

歸故林別知己

別離無古今柳色向人深萬里長江水平生不印心遠
書容北鴈贈別謝南金愧勉青雲志余懷非陸沉

送僧遊天台

囊空心亦空城郭去騰騰眼作麼是眼僧誰識此僧歇
隈紅樹久笑看白雲崩已有天台約深秋必共登

詠竹根蛟子

出處慚林藪才微幸一陽不緣懷片善豈得近馨香節
亦因人淨聲從擲地彰但令筋力在永願保時昌

硯瓦

淺薄雖頑朴其如近筆端低心蒙潤久入匣更身安應

念研磨苦無為瓦礫看儻然仁不棄還可比琅玕

水壺子

良匠曾陶瑩多居筆硯中一從親几席常恐近兒童
卓立澄心久提携注意通不應嫌器小還有濟人功

筆

莫訝書紳苦功成在一毫自從蒙管錄便覺用心勞
手點時難棄身閒架亦高何妨成五色永願助風騷

碁

其信無聲樂偏宜境寂寥著高圖暗合勢旺氣彌驕人
事掀天盡光陰動地銷因知韋氏論不獨為吳朝

夜對雪作寄友生

皓彩中宵合開門失所蹤何年今夜意共子在孤峰氣
射燈花落光侵壁罅濃唯君心似我吟到五更鐘

題惠琮律師院

苦節兼青目公卿話有餘唯傳黃葉喻還似白泉居猿
撥孤雲破鐘撞衆木踈社壇蹤跡在重結復何如

寄清冷山道人

常憶清冷子深雲種早禾萬緣雖不涉一句子如何蹤
跡諸峰匝衣裳老風多江頭無事也終必到烟蘿

秋盡途中作

行行芳草歇潭島葉紛紛山色路無盡砧聲客強聞殘
陽曜極野黑水浸空墳那得無鄉思前程入楚雲

秋居寄王相公三首

禪林蟬蛻落地燥可生苔好句慵收拾清風作麼來餅

唯飡喜悅社已得宗雷還似山中日柴門更不開

又

松聲高似瀑藥熟色如花誰道全無病時猶不在家

六逐

塵名不在家也

山童春菽粉園叟送銀瓜誰訪孫弘閣談玄到

日斜

又

氣與非常合常人爭得知直須窮到底始是出家兒閣
崔銜紅粟鄰僧背古碑祇應王與謝時有沃州期

讀玄宗幸蜀記

宋璟姚崇死中庸遂變移如何遊萬里祇為祿山兒泣
濁乾坤色飄零日月旗火從龍闕起淚向馬嵬垂始憶
張丞相全師郭子儀百官皆剽劫九廟盡崩墮塵撲銀
輪暗雷奔棧閣危倖臣方賜死野老不勝悲時有羣史
逸道泣見
于上及雷飄淪日行宮寂寞時人心雖未厭天意亦難知
聖兩歸丹禁勲名太華齊因知納諫諍始是太平基

禪月集卷八